

Inatsisissatut siunnersuutiniq suliaqartarneq pillugu malitassiat atuuttut allanngortinneqarnissaat pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaalilluni inatsisissatut siunnersuutip nassuiaataani, nunat tamat akornanni pisussaaffinnut, nunat tamat akornanni Kalaallit Nunaanni Namminersorlutik Oqartussat malitassaanni pisussaaffinnut tunngatillugu inatsisissatut siunnersuummi inuit pisinanatitaaffiit aamma nunap inoqqaavisa pisinnaatitaaffiit tunngasunik nassuiaasiortoqartassalluni. Naalakkersuisut suleriaasiat nutaaq ulloq 1. januar 2026 atuutilissaaq.

(Inatsisartunut ilaasortaq Mariane Paviassen Jensen, Inuit Ataqtigiit)

(Siullermeerneqarnera)

Qujanaq Inatsisartunut ilaasortaq Mariane Paviassen Jensen siunnersuummut.

Demokraatit isumaqarput, ullumikkut pitsaasumik inatsisiliortaaseqareersugut, inatsisissatut siunnersuutit tamarmik suliarineqarnerminni kingunerisinnaasai tamarmik kalluarneqartarlutik soorlu assersuutigalugu pisortanut aningaasaqarnikkut kingunerisinnaasai, innuttaasunut aammalu namminersorlutik inuussutissarsiortunut. Aamma assersuutitut silaannaap allanngoriartorneranut kingunerisinnaasai nassuiartinneqartarlutik. Taamatuttaarlu piumasaqaataavoq, piffissamik tusarniaanermik peqassasoq, kikkut tamarmik inatsisissatut siunnersuummut isummersorsinnaallutik.

Uuminnga siunnersuuteqarnermini siunnersuuteqartup kissaatigaa, inatsisissatut siunnersuutit aamma nassuiaaserneqartassasut nunani tamalaani pisussaaffitsinnut kingunerisinnaasunik tassani pingaartumik inuit pisinnaatitaaffiit aammalu nunap inoqqaavisa pisinnaatitaaffiit.

Tamanna Demokraatiniit ajoriffissaqartinngilarput. Kisiniannili taamaaliortuaannaratta sukumiisumik eqqarsaatigeqqaartariaqarparput taamatut isummernerup suut kingunerisinnaanera. Siunnersuutip ilimanarpoq kingunerissagaa, inatsisissatut siunnersuusiortarnerup akisunerulernissaa sulisoqarnikkut aningaasatigullu. Kingunerissavaa, pisortat allaffeqarfianut aningaasartuutit qaffannerat. Tamannami, partiit tamarmik akerlerigaluarpaat. Pisortat allaffeqarfiata annertusinerata politikkikkut aningaasaqarnikkullu namminiilivinnissarput ungasillisartuaannassavaa. Demokraatini ima suliniartarpugut, pingaarutilinnik tunngavissaqarpat aatsaat, aalajangernernut peqataassasugut, allaffissornermut aningaasartuutiniq qaffaatissanut.

Tamanna tunngavigalugu uagutsinnut pingaartuuvoq, ataatsimiititaliami suliniarnissami annertuumik ukkatarineqassasoq, uuma siunnersuutip pisortat allaffissornerannut aningaasartuutitut qaffaassutaanissaa. Tamanna qulaajarneqareerpat isummissaagut, siunnersuut tapersissanerlugu.



Taamatut oqaaseqarluta siunnersuut inatsisit atuutsinneqarnerannut ataatsimiititaliamut innersuupparput.